

冷

廬

雜

識

冷廬雜識卷七目錄

陳忠愍公

陳學博詩

西湖長生祠

天一閣

都門竹枝詞

禁咒治病

馬從龍

子衿非淫詩

孫泰倡和詞

房暉遠

劉後村

更迭交戰

雜喜

嚴比玉藏書畫

唐冰溪先生

沈姬傳方

吳烈女

歸宮簪

戴益生

刑名幕聯

知不足齋叢書

府州縣同名

箸謎

改官詩

寫書求官

今勝於古

追尊稱帝

地志

姚兵部

沈潛士詩

阮文達公聯

許秀山

學官聯

檳榔

許氏科第

橋李

趙儀姑詩

理財

大佛寺聯

鹿坪師聯

世次

鼠

唐明府

戴孝廉詩

沈胎簪詩

葛壯節公駢詔

上官皇后

避諱

劫寨

明闢編

吳中行

經學理學

柳仲塗作銘

劉軻

斛銘

養一齋詩話

龍井寺

蔣叅公鞞聯

竹杖漫厠

九言聯

妝域

觀龍舟詩

歸去來辭序

顧橫波小像

一字師

千字文

劉太史詩

姚明府

思忠錄景思錄

徐阮鄰師詩

李芝齡師詩

元駢體文

梁楚生詩

學醫宜慎

岳王祠聯

惲南田詩

評蘇詩

鐵畫

沈觀察

湯將軍殉節詩

金總憲論詩

吳雪坡詩

岳小坡詩

蔣禮山

舅氏周愚堂先生詩

字宜从今

朱梅叔

題棺

關侍郎

江西三魏

明狀元爭奪情

沈觀察詩

嚴伯牙詩

韜光

西山文集

乾霍亂

石灰

劉忠義

冷廬雜識卷七

桐鄉 陸以湜 敬安

陳忠愍公

同安陳忠愍公化成由行伍積軍功官至提督威望著
一時故例提鎮不得官本鄉

上以非公莫能膺海疆重任破格授廈門提督道光庚
子倭夷擾浙東

命沿海嚴防特移公江蘇抵署甫六日聞舟山失守卽
帥師馳赴吳淞口審度險要列帳西礮臺側以居三易

寒暑未嘗解衣安寢優待士卒犒之厚而自奉甚儉或饋酒肉必峻卻之時有官兵都吸民膏髓陳公但飲吳淞水之謠每潮來必登瞭望戒軍士曰平時宜休養毋輒來轅如有警呼之不應刑毋赦嘗與制府牛某大閱見近地兵多弱而上江各營較強牛曰是可當前鋒乎公曰近者皆有室慮且服吾久無離心客兵恐難恃及戰果先遁壬寅四月乍浦失守公益鼓勵軍士以大義喻之時他邑皆騷動惟吳淞左右恃有公安堵如故五月夷船大集公登臺守禦日夜不怠初八日自卯至

已發礮千餘門傷大夷船五火輪船二夷人勢欲卻適
牛制府攜兵出城夷從牆頭望見置礮於牆擊之牛急
召守小沙背之徐州總兵王志元來而王已遁去牛懼
亦遁衆兵隨之皆竄夷人復奮力攻擊公孤立無助猶
手發礮數十次身受重傷礮折足鎗穿胸伏地噴血而
死年七十六民間公死皆大驚曰長城壞矣老幼男女
無不號泣奔走夷酋入城登鎮海樓酣飲或作華語曰
此戰最危險但有爾陳公安能破耶酋大笑有武進士
太湖劉國標爲公所賞識隨行戎間忽創負公屍藏蘆

叢中間十日以告嘉定縣令輦屍入城殮於武帝廟面
如生事聞

詔賜專祠予騎都尉世職淞江人哭公哀作詩成帙顏
曰表忠崇義集寶山王樹滋爲作殉節始末記余特撮
其大略并錄詩之佳者於左云一木難支大廈傾將軍
殉節萬民驚丹心料有天垂鑒白日愁看鬼橫行公已
成仁甘就死士惟見義竟忘生怒濤夜激蘆花岸陰雨
靈旗戰鼓聲

上海王城

皓首不能生擊賊丹心惟此死

酬君

上海陳培庭

肘常旁掣生餘憤掌僅孤鳴死竭忠

崇明施子良

右師那洩驅車後壯士勾卑在列時上海

林曜

事到艱難惟一死身經保障已三年上海曹樹杏

陳學博詩

同里陳友梅學博錫績學能詩晚歲以歲貢官青田訓

導蕭然一瓊吟哦自得歿後遺稿散去余從其孫邦桂

處檢得數首存之芝田云百里芝田隸括蒼一城斗大

似村鄉龍鬚草細密成席

龍鬚巖生草如龍鬚土人取織成席名曰龍鬚席鵝

卵石圓高築牆

民間磚牆甚少大率以石砌之曉雨採樵閨女慣之邑

八外都有鍾氏聚族而居不婚外姓生女不纏足自幼耕田砍柴嫁後入市交易其夫守戶而已謂之番民

夜燈課讀塾師忙

師有兼夜課者人家子弟或晝耕而夜就傅

何當羣鶴重

飛集科目聊增藝苑光

明永樂庚子鶴大集一邑中式十六人自後鶴至必得科名然

亦寥寥矣

國朝一百六十餘年以來登科者僅四人

張貞女并序云貞女吾鎮

張希賢女也許字沈氏子未幾沈卒誓欲歸省遂縞素

以往隻影煢煢克修婦道閱八載病亡其節可嘉賦詩

以俟采風者未識夫君而終身願託依其牢惟木主入

室便麻衣八載冰霜潔千秋節義稀他年塚樹上鴛鳥

定雙飛讀秦紀云若教博浪斃秦皇定見扶蘇帝萬方

始識一椎非倖脫天心正欲速羸亡

始識一椎非倖脫天心正欲速羸亡

西湖長生祠

西湖長生祠極多楹聯佳者莫實齋侍郎題諸城寶東
臯總憲光鼐長生位云憐才心事無雙教澤深長留學
校知己生平第一師恩高厚竝君親山陽李芝齡師宗
昉題汪文端公長生位云政竝白蘇遺澤遠文成雅頌
繼聲難杭郡紳士題帥仙舟中丞長生位云兩浙人來
歲祝選湖山勝境雙隄門外風流繼唐宋名臣又題劉
金門侍郎長生位云歸興託尊鱸一代文章留北闕清
芬接梅鶴百年風教在西湖

天一閣

甯波范氏天一閣藏書凡五萬三千餘卷閣在月湖之西宅之東牆圍周廻林木蓊鬱與閶闔相遠明嘉靖中堯卿少司馬欽歸田後構以藏書其異本得之豐氏熙坊者爲多書藏閣之上通六開爲一而以書厨間之其下仍分六開取天一生水地六成之之義司馬歿後子孫各房相約爲例凡閣厨鎖鑰分房掌之禁以書下閣梯非各房子孫齊至不開鎖子孫無故開門入閣者罰不與祭三次私領親友入閣及擅開厨者罰不與祭一

年擅以書借出者罰不與祭三年典鬻者永擯逐不與祭乾隆間

詔建七閣參用其式且多寫其書入四庫

賜以圖書集成嘉慶間阮文達公巡撫浙江命范氏後人編成目錄并金石目錄刻之自明嘉靖迄今三百餘年遺籍常存罔由於遭遇之盛抑亦其立法嚴密克保世澤於勿替宜名垂不朽爲海內藏書第一家也

都門竹枝詞

都門竹枝詞不知何人所作語多鄙俚其描摩逼真處

亦足令人解頤時尙云多多益善是封條拉扯官銜宋
字描遠代旁枝搜括盡直將原任溯前朝京官云轎破
簾幃馬破鞍熬來白髮亦誠難兼車當道從旁過便是
當朝一品官候選云昔年黃榜姓名聯此日居然掌選
銓堂上點名堂下應教人不敢認同年考試云短袍長
褂著鑲鞋搖擺逢人便問街扇絡不知何處去昂頭猶
去看招牌教館云一月三金笑口開擇期啟館託人催
關書聘禮何曾見自僱驢車搬進來觀劇云坐時雙腳
一齊盤紅紙開來窄戲單左右竝肩人似玉滿斟不向

戲臺看

禁咒治病

禁咒治病自古有之往往文義不甚雅馴而獲效甚奇殆不可以理測余內人之乳母顧嫗其父曾習祝由科傳有二咒甚驗一治蜈蚣螫咒云止見土地神知載靈太上老君急急如律令勅治法以右手按螫處一氣念咒七遍卽揮手作撮去之狀頃刻痛止一治蛇纏咒云天蛇蛇地蛇蛇騰青地扁烏稍蛇三十六蛇七十二蛇蛇出蛇進太上老君急急如律令勅凡人影爲蛇所啄

腰生赤癰痛癢延至心則不可救名蛇纏亦名纏身龍
治法以右手持稻榦一枝其長與腰圍同向患處一氣
念咒七遍卽揮臂置稻榦門檻上刀斷爲七焚之其患
立愈又治蜈蚣螫方急以手向花枝下泥書田字勿令
人見取其泥向螫處擦之卽愈

馬從龍

明史載列女谷氏餘姚史茂妻父以茂有文學贊之於
家數日鄰人宋思徵責於父見氏美遂指逋錢爲聘物
訟之官知縣馬從龍察其誣杖遣之及氏下階茂將扶

以行氏故未嘗出閨閣見隸人林立而夫以身近已慙
發赭推茂遠之從龍望見以氏意不屬茂也立改判歸
思思卽率衆擁輿中而去氏乘閒縊死從龍聞之大驚
捕思思已亡去因疑似之迹而使貞婦含恨以死此由
於辨之不精而發之太驟也聽訟者可不慎與

子衿非淫詩

子衿非淫詩蕭山沈補堂豫引晉書左貴嬪離思賦彼
城闕之作詩秀亦以日而喻月謂如果褻狎之什豈有
椒壁之寵而寫諸彤管者乎證據甚確

孫秦倡和詞

吳門孫月坡茂才麟趾家貧嗜學尤工填詞旅食金陵
與江甯秦雪舫部曹耀曾交好倡和成編孫送雪舫之
豫章詞云帆影搖雲潮聲咽雨客裏暗添離緒櫻桃門
巷送春天忍教拋故園尊俎簾櫳日暮抱湘瑟拂絃愁
誤倚危闌料今宵魂夢相隨柔艣長亭路幾箇啼鵲
幾簇無情樹看山此後其誰游嘆才人也如飛絮辭家
最苦道彈指歸與便賦怕君歸儂又扁舟遠去
秦亦有詞留別云鶯情燕倦春殘還又扁舟催理短短
西子粧

蘆芽引著片帆千里驛門不用栽楊柳已是魂銷流水
待新詞譜就鴟絃彈處怕人垂淚滿江千是恨南朝
勝迹怨碧愁紅無際坐向蓬窗多少舊情重記渡頭一
枕游仙夢袖帶匡廬雲氣把歸期再訂黃梅熟後棟花
風裏陌上花二作皆有情味

房暉遠

隋高祖嘗謂羣臣曰自古天子有女樂乎楊素以下莫
知所出遂言無女樂房暉遠進曰臣聞窈窕淑女鍾鼓
樂之此卽房中之樂著於雅頌不得言無高祖大悅暉

遠此言根據經術又能導君以正深得獻替之義五經
庫之譽良不虛也

劉後村

宋劉後村克莊知建陽縣時詠落梅云東風謬掌花權
柄卻忌孤高不主張言官李知孝梁成大劾其謗訕鄭
清之力辨得釋後賦訪梅詩云菊得陶翁名愈重蓮因
周子品尤尊後來遂判梅公案斷自孤山迄後村其自
命高矣惜晚年爲賈似道一出志節未堅能毋讓和靖
獨有千古哉

更迭交戰

李自成攻甯武周遇吉悉力拒之城圯復完者再傷其四驍將自成懼欲退其將曰我衆百倍於彼但用十攻一番進蔑不勝矣自成從之前隊死後復繼官軍力盡城遂陷按南宋張翥守南劍州禦寇分州兵爲數隊令多具飯將戰則食第一隊人旣飽遣之出城便食第二隊人度所遺兵力將困卽遣第三隊人往代第四至五六隊亦如之更迭交戰士卒飽而力不乏盜之計深合古人之法惜爲自成所用也

報喜

婁縣姚春木上舍椿晚學齋文集謂吳節愍公不從薙髮自縊死所遺家書題曰報喜徐璽丞無念乙酉闔門殉節亦稱喜終居士蓋明士大夫固以盡忠爲喜耳苟論者未之知也余謂苟論者蓋以好名之積習深也抑知其激發忠義慷慨捐生實足扶翼名教愧天下後世之苟且圖存者如是則好名正足貴耳奚病焉

嚴比玉藏書畫

比玉太守家藏書畫甚多道光甲申春曾與董石農

山人榮同觀最任者如李龍眠真武像趙承旨洗馬圖
戴文進夏木垂陰大幅俱入神品又文衡山雪景大幅
自題詩云雲埋嶺樹雪漫漫天削芙蓉萬玉攢小筵不
辭山路永十分詩思屬吟鞍李流芳山水自題云每愛
疎林平遠山倪迂筆墨落人閒幽人近卜城南住爲寫
東風水一灣亦皆妙品

唐冰溪先生

同里唐冰溪先生琦熟精史漢文品極高乾隆庚辰鄉
墨樊遲請學稼一節中比云凡人有所學當自識其爲

吾知有不可不如者而後知有可以不如者人有所請
當識師之爲吾而知有舉世不如者而後知有舉世皆
如者筆意清雋非巨眼亦不能識也生平有潔癖每赴
宴飲必自攜杯箸以往終席盥漱十數次初得中正榜
引見後以口噴氣以手拂塵

上以爲書狀子後班遂撒不引見人皆以此咎先生
登第後歸部銓選時年已五十自以無濟世具不之官
垂老猶以授徒爲業年七十五卒於分水書院

沈姬傳方

單方之佳者不必出自方書往往有鄉曲相傳以之治病應手取效者吳江沈姬服役余家曾傳數方試之皆效備錄之 痔瘡用皮硝煎湯乘熱薰洗此方治熱毒皆效 小兒雪口瘡馬蘭頭汁擦之 眼癬大盥幕布以晚米糠置布燃糠有汁滴盥取抹患處

吳烈女

永康吳教諭士騏之女宗愛字絳雪國色也幼慧十餘歲父教令作詩詩輒工兼工繪事嫁邑諸生徐明英早寡康熙十三年耿精忠僞總兵徐尙朝陷處州游兵至

永康邑人磨竄尙朝令人宣言日以絳雪獻者免衆議
行之以紆難勢洵洵絳雪念徒死貽桑梓憂乃僞請行
至三十里坑投崖死年僅二十四道光癸卯桐城吳廷
康爲永康丞慨絳雪死一百七十餘年邑人無以文發
之者爲刻其遺詩二卷而屬海甯許農部桐爲之傳予
述其略如右且摘詩句於左秋夜偶成云香綠漏永薰
還冷錦爲愁多織未成春曉寄二姊云山含軟碧猶春
雨門掩濃陰半落花春日有懷素開云疏風小圃宜鶯
粟細雨新蔬採馬蘭憶外云貧家蔬筍憐佳節驛路風

波阻遠人又寄外弟絕句云貧賤驅人少勝籌天台境
好任淹留尋仙不是韶年事好遇桃花便轉頭

歸宮詹

國初順天鄉試主考官用翰林同房官用部曹行人中
書等官而直隸省實缺知縣及候選進士亦皆用之見
常熟歸孝儀宮詹允肅康熙辛酉爲順天主考官入闈
誓辭前此士子競趨聲氣宮詹守正不阿一秉至公榜
發下第者譁然肆詆冀興大獄時蔚州魏敏果公象樞
以朝端重望步行隨一僕攜紅褐氍毹至宮詹邸第門外

行四拜禮曰我爲

國家廣得人復賦詩以紀事謗者乃息其誓詞有云絕
黃緣奔競之階務求實學杜浮薄誇張之習不採虛聲
對閣公堂退無私語期諸同事各矢此心倘或爲利營
私徇情欺主明正國法爾伏冥誅甘受妻孥戮辱之慘
必膺子孫絕滅之報潔誠具告神其鑒之

戴益生

嘉定戴益生孝廉增性情誠樸學問淹通乙未歲見於
京師如舊相識遂與訂交丙申出都後不復相見戊戌

得其來書云與閣下別久矣晴窗孤坐輒復相憶引領

南望情焉於懷去春得書知己啟行往楚及固翁

謂舅氏固

軒先生

入都又接書并惠筆墨二種良朋厚愛銘戢良深

屢欲作答實緣楚水燕山鱗鴻杪便相知不在形迹諒

不責其疏嬾也客秋閱邸抄知閣下改就教職都中朋

輩咸謂閣下失計而增獨心悅誠服其欽佩有莫可形

容者夫牧令之難未有甚於此時者也以視苜蓿一盤

詩書萬卷尋古賢之樂儲名山之業其得失何如有定

識有定力閣下於此真不愧一定字增春闈四寫故我

依然自知猿臂將軍封侯無命不過逐隊入試盡其在
我不敢作上林棲一枝想也教習已報滿以教職用
聖恩高厚適如私願固翁說閣下已就館茗上甚慰固
翁人品學問實可師事惜遠寓東城不得昕夕過從耳
茲因固翁南旋之便率泐布臆臨穎馳溯不盡覲縷戴
簪有述懷詩句云耽書枉自窮三昧作客何堪過十年
讀之令人感喟無已辛丑歲聞其以疾卒於家年僅四
十命不副德遇不副才是可痛也

刑名幕聯

汪龍莊大令爲刑名幕賓時書聯座右云苦心未必天
終負辣手須防人不堪近有人贈刑名幕賓聯云求其
生不得則無憾勿以善之小而弗爲語亦警迨

知不足齋叢書

歙縣鮑萊飲先生廷博寓居吾里之楊樹濱好學博聞
尤喜蒐羅散佚乾隆時開四庫館獻書七百種

欽頒圖書集成旋刻秘籍數百種曰知不足齋叢書進
呈

乙覽

宸翰賜題卷首有知不足齋奚不足渴於書籍是賢平之句

睿皇帝復 賜以舉人

兩朝褒寵可謂極稽古之榮矣所刻叢書校訂精審風行海內舊謂與其私千萬卷於已或子孫不爲之守執若公一二冊於人與奕禮其永其傳今其孫曾輩以書爲業奇編寶笈價重藝林蓋猶食其報云

府州縣同名

今天下幅員廣遠府州縣同名者甚多彙記於左以備

考錢竹汀宮詹潛研堂集中辨名篇尙有遺漏茲所記者較詳亦未必無舛誤處俟再考正

府同名

太平 安徽廣西

州同名

通州 直隸江蘇 開州 直隸貴州 趙州 直隸雲南

甯州 甘肅雲南

永甯州 山西廣西

縣同名

會同 湖南靖州府海豐山東武定府 瀘溪 江西建昌府湖南辰州府

廣東瓊州府 冷廬雜識卷上

五

清溪

四川雅州府

鳳臺

安徽鳳陽府

安仁

江西饒州府

桃源

江蘇淮安府

龍門

直隸宣化府

石門

浙江嘉興府

新安

河南河南府

興安

江西廣信府

永安

福建延平府

樂安

江西撫州府

甘泉

江蘇揚州府

石泉

陝西興安府

太和

安徽潁州府

清河

直隸廣平府

山陽

江蘇淮安府

海陽

山東登州府

東鄉

江西撫州府

甯鄉

湖南長沙府

新昌

江西瑞州府

廣昌

直隸易州府

建昌

直隸承德府

安平

直隸深州府

清平

山東東昌府

鎮平

河南南陽府

石城

江西甯都府

興甯

湖南郴州府

咸甯

湖北武昌府

廣東高州府

廣東嘉應州

陝西西安府

大甯

山西解州府

廣甯

奉天錦州府

華亭

江蘇松江府

山陰

浙江紹興府

三水

陝西邠州府

甯遠

湖南永州府

永定

福建汀州府

安定

陝西延安府

宣化

直隸宣化府

昌化

浙江杭州府

德化

江西九江府

安福

江西吉安府

建德

浙江嚴州府

唐

直隸保定府

永福

福建福州府

三縣同名

東安

直隸順天府

龍泉

浙江處州府

西甯

直隸宣化府

新甯

湖南寶慶府

長甯

江西贛州府

永甯

河南河南府

懷遠

安徽鳳陽府陝西榆林府

定遠

安徽鳳陽府四川重慶府

安化

湖南長沙府甘肅慶陽府

長樂

福建福州府湖北宜昌府

四縣同名

太平

安徽甯國府浙江台州府

新城

直隸保定府浙江杭州府

箸謎

北史咸陽王禧傳載箸謎云眠則同眠起則同起貪如
豺狼賊不入已蓋以諷貪墨者也袁簡齋太史詠箸詩
云笑君攫取忙送入他人口一世酸醎中能知味也否
卽本此謎之意按中州集周馳詠箸詩云正使遭護口

何嘗廢直躬寓意似勝哀詩

改官詩

道光丙申至楚需次自知無濟世才陳請改官賦詩云
鳬鷺小隊降心從學步邯鄲苦未工三復昌黎盤谷序
出山深悔負初衷紅塵滾滾撲征衫墮落何由骨換
凡宦海波濤深莫測幾人安穩得收帆撫字催科雨
不勝有絃可改瑟堪乘思歸若待秋風起欲脫塵鞿恐
未能簪筆雍容志已虛不如歸去舊蓬廬高風輸與
瀛洲客萬卷名山正著書

吾郡馮太史登府
現爲甯波教授

求賢大

府禮優崇刮目居然到阿蒙
衮衮諸公多偉略不才何

用濫竽充

中丞周公之琦命俟秋闈分校後方伯張公岳崧謂當一視縣事乃決去留不然將後悔

余力辭始允

書生濟世少奇猷得就閒曹願已酬
莫恨雲

衢升未竟有人平地尙淹留
旣改官作歸興詩云此去

真爲泛宅行扁舟江上訂鷗盟
酒從黃葉聲中醉詩向

青山影裏成高枕連宵酣旅夢
小牋沿路記歸程掉頭

笑謝風塵侶圖史蕭然萬慮清
百丈雲梯未可階寒

壚仍問舊生涯祇慙報

國心終負且喜還山夢竟諧
書卷隨身無恙在田園樂

志有人偕卜居擬傍漁翁宅蒼雲煙波處處佳

寫書求官

大唐新語李襲譽謂子弟曰吾不好貨財以至貧乏京城有賜田十頃可以充食河南有桑千株可以充衣寫得書萬卷可以求官汝曹第勤此三事何求於人夫寫書而僅以求官見何卑也然必有萬卷之書始可求官亦豈易事耶

今勝於古

祭之用尸也葬之用殉也媵之以姪也刑之以肉也婦

人之以廢疾無子出也古也有之今則亡是今之勝於古者

追尊稱帝

唐世追尊稱帝者高宗子孝敬皇帝宏範卽尊稱爲帝是以父尊其子也睿宗子讓皇帝憲追尊於元宗時元宗子奉天皇帝琮追尊於肅宗時是皆以弟尊其兄也肅宗子承天皇帝俔追尊於代宗時是以兄尊其弟也

地志

錢竹汀宮詹跋成化四明郡志云王文恪公撰姑蘇志

楊禮部譏其不通或請其說曰此蘇州府志也而云姑蘇不正矣文焉得通常時傳誦其言予謂文恪撰述夫有所受未可非也試卽宋元地志之傳於今者言之梁克家三山志陳耆卿赤城志楊潛雲間志非宋之州郡縣名也徐碩嘉禾志張鉉金陵新志秦輔之練川志非元之路名縣名也志蘇州而以姑蘇名何渠不可史家敘事地名官名當遵時王之制行狀碑誌亦史之類也若蘇州知府而易爲吳郡守施諸誌狀則爲非法至於詩賦記序自可不拘斯例竊謂宮詹引三山志等書以

排楊禮部之言其說是矣至謂行狀碑誌亦史之類當
遵時王之制則地志獨非史之類乎而豈得同於詩賦
紀序之可不拘斯例乎伏讀

欽定四庫全書總目有云志書題古地名自宋代已有
是例核以名實良有未安此誠持平之論矣

姚兵部

歸安姚鏡堂兵部學塏學問瞻博品尤高卓官京師數
十年寓破廟中不攜眷屬趨公之暇以文酒自娛朝貴
罕識其面曾典貴州鄉試門下士饋贄金者力卻之惟

贈酒則受因是貧特甚出不乘車隨一僮持衣囊而已
所服皮衣冠毛墮半見其髀每行于道中羣兒爭指笑
之兵部夷然自若也嘗賦梅子詩云臭味偏於吾輩近
風懷莫遣女郎知一時推爲絕唱其他佳句如謝人送
菜云但使斯民無此色願教我輩味其根送閔貢甫之
揚州云養志未須嫌祿薄讀書大好是官閒皆清妍絕
俗

沈蒿士詩

烏程沈蒿士比部同年丙瑩幼耽吟詠以家貧親老奮

志功名刻苦攻舉子業通籍後遂專力於詩所造日上

其寓感詩有慨言之深得主文譎諫之旨歟鵲法也鳥

將雛雛飛在路隅有鵲有鵲善取子空中一擊無完膚

手爪毒網羅觸鵲有罪分不可贖鵲與雛何怨雛與鵲

何仇與鵲亦無怨與雛亦無仇只緣攫取口中哺乃鹽

其腦格其喉口中哺曾有幾性命鴻毛判一死饑不擇

食至於此吁嗟乎安得粟滿野甚滿林鵲鵲鵲兮化

爲祥禽惻惻下傷刺也美人織當戶五色工纂組可憐機中

縷縷縷昔辛苦吳蠶作繭口卒瘁吳蠶作蛹蠶復蘇獻

蘭者誰心膽粗剝取入已肥妻孥剝蘭一何酷蛹在蘭
中哭蛹哭渺不聞生機漸以蹙宛轉將死未死時我爲
請命前致詞蛹兮蛹兮好護持生子明年還吐絲

阮文達公聯

嘉慶初阮文達公撫浙爲鄉試監臨題貢院聯云下筆
千言正桂子香時槐花黃後出門一笑看西湖月上東
浙潮生歸安王勿巷侍郎以銜之太夫人八秩壽辰公
賀聯云多子雨魁天下士侍郎乾隆乙卯狀元其弟以錫同科會元大年三
歷太平朝錢塘魏春松觀察成憲之出守揚州也公贈

聯云兩袖清風廉太守二分明月古揚州又題吳山呂
祖殿澄心閣云仙佛緣中湖山勝處樓臺影裏雲水閒
時是真能吐棄凡豔天然入妙者

許秀山

臨海許秀山布衣保喜種花尤愛蘭菊菊種多至百餘
每至花時五色繽紛先君子恆從乞種因書聯以贈云
噉淡飯著粗衣谷屬團圓終歲樂伴幽蘭對佳菊花枝
爛漫滿庭芳又題其琴鶴圖云流俗不可侶伴身惟鶴
琴山空涼月皎亭古綠陰深雙鶴有仙骨七絃皆道心

幽居愜真賞長此滌塵襟許精於醫爲人診病不計酬
金曾傳余秘方試之皆效附錄之以濟世治頭風用頭
風膏藥入草烏末少許貼之治牙痛用北細辛五錢薄
荷五錢樟腦一錢五分置銅鍋中上覆小碗紙糊泥封
勿通氣緩火熏之令藥氣上升至小碗取塗痛處治刀
傷久爛用生糯米於清明前一日一換水浸至穀雨日
曬乾研末敷之治火燒傷方雞子煮熟去白取黃猪油
去膜二味等分搗勻抹之

學官聯

學博向稱冷官以其位卑祿薄不能自豪也蘇州教授
李時菴恩沛自題大堂聯云掃雪呼僧莫認今朝點卯
轟雷請客都知昨日逢丁堪發一噓蕭山傅芝堂學博
錢作聯自嘲云百無一事可言教十有九分不係官語
更諧妙然事簡責輕形神安泰仁和宋學博成勳有聯
云宦海風波不到藻芹池上

皇朝雨露微沾苜蓿盤中又孫學博學垣聯云冷署當
春暖閒官對酒忙是均能遣寒暄趣味者至福清林譯
之作菲儉常是官卑廉自尊

林官海審教
國初人以辭質旨深

直可作官箴讀矣祿薄儉常足官卑廉自尊見明姚宣
以題其堂聯林
聞見錄左忠毅公光斗官中書時嘗
蓋襲用其語

檳榔

醫書檳榔治瘴川廣人皆喜食之近則他處亦皆效尤
不知其性沈降破洩真氣耗損既久一旦病作不治莫
識受害之由嗜之者終無所警也余按宋周去非嶺外
代荅有云川廣人皆食檳榔食久頃刻不可無之無則
口舌無味氣乃穢濁嘗與一醫論其故曰檳榔能降氣
亦能耗氣肺爲氣府居膈上爲華蓋以掩腹中之穢久

食檳榔則肺縮不能掩故穢氣升聞於輔頰之間常欲
噉檳榔以降氣實無益於瘴彼病瘴紛然非不食檳榔
也此論檳榔之害最爲切要知非特無瘴之地不可食
也嗜檳榔者其鑒之

許氏科第

嘉慶道光以來仁和許氏科第最盛駕部謹身閣墨房
評云數來族望囊中能有幾家問到科名榜上視爲故
物稱許可云允當

檇李

嘉興本橋李地所產李卽以是爲名色紅肉脆而味絕
鮮吾郡果品以此爲最惜不可多得皮有爪痕相傳爲
西施所搯此殆飾說耳而文人賦橋李者必及之如朱
竹垞賦云傳諸故老一事矜奇遇入吳之西子胭脂之
漚舟移經纖指之一搯量心賞之在斯何造物之工巧
兮化千億於來茲雖彼美之云亡兮髮髻若或覩之金
學博介復詩云此邦書越絕彼美憶西施指點痕如捻
流傳事不疑沈明經翼詩云爪痕千古在入市合輸錢
皆指此也

趙儀姑詩

上海趙儀姑女史榮歸安汪參軍延澤之配也天性高
朗有丈夫風骨博習經史兼工吟詠著有瀝月軒詩集
句如殘紅盡落啼鶯老衆綠新生好雨多五夜懷親空
有夢十年遣日只憑詩春晚云纔脫春衫換夾紗東皇
何事便思家杜鵑聲裏斜陽暮深閉幽窗避落花俱始
妙

理財

三代以下善理財者莫如劉晏不善理財者莫如王安

石一則利國而不傷民一則害民而遂病國也

大佛寺聯

西湖大佛寺有沁雪泉其題聯云沁雪貯寒泉一片清
虛照徹大千世界開山成寶相十分圓滿想見丈六金
身語特雅切

鹿坪師聯

沈鹿坪師作對聯警鍊自然人爭傳誦恐日久散佚備
錄於此太均神祠云德竝高祿猶衆之母慈同大士則
百斯男烏程城隍神祠云一城捍天下兵丹心貫日月

語留身後誓鐵面凌霜

神爲張睢陽像臉色黑以有爲厲鬼殺賊語也

吾里李

臨川先生祠云德仰儒宗次立功次立言歿而可祭於

社名垂史冊古遺直古遺愛過者猶式其閭嚴比玉太

守之母蔡太恭人四十生辰聯云長日綠衣孫抱戲盛

年紗幔子傳經蔡太恭人輓聯云禮重延賓七載倍欽

陶母誼訓垂翼子一家齊凜敬姜箴李鶴杉學博日熾

之尊人秋霞先生允楓輓聯云慙未因羣隨謁紀慘於

見紹輒思康

鶴杉從師游而師與秋霞先生未嘗謀面

德清陸號菴先生震

東七十壽聯云地本仙居鳩杖親攜尋藥餌官真吏隱

鶴觴小酌詠梅花

時官湖居教諭

湖州楊氏祠堂聯云祠開著

左新門第村紀閣西舊世家題某道士居云受錄開宗
千秋香火人開世棲真卜築一室煙霞物外身官台州
教授時督修文廟題堂聯云事可問心甯任怨功難藉
手敢辭勞

世次

漢書孔光傳孔光孔子十四世之孫也後漢書光武帝
紀世祖光武皇帝高祖九世之孫也皆連身敘世次北
齊神武紀六世祖隱生慶慶生泰泰生湖湖生謚謚生

皇考樹乃離身爲六世後人敘世次皆離身如穆員陳
子昂柳子厚蘇子美父誌稱高祖上一世爲五代祖五
世祖是也

鼠

爾雅獬鼠於釋獸以四足而毛謂之獸也埤雅隸鼠於
釋蟲以其爲穴蟲之長也鼠之種見於爾雅者十有四
有同名而異種者爲鼯鼠一在寓屬一在鼠屬有與鳥
同穴者爲鼯至釋鳥之鼯鼠釋蟲之鼠負則與寓屬之
鼯鼠皆名鼠而實非鼠矣

唐明府

吾里唐明府炳由庶吉士改官桃源縣令歿後有挽之
者云天上謫仙此去依然參桂署人間隱吏今來何處
問桃源人皆稱其雅切

戴孝廉詩

杭州戴孝廉兆元工詩嘉慶戊辰會試詩題天臨海鏡
友人某以病倩戴代作詩起聯云善納真如海能容卽
是天以是獲售而戴竟不第坎壈終其身

沈胎簪詩

同邑沈胎簪大令淮受業於先君子工篆刻能詩以按
貢官山左懲胥吏之弊賦感事詩云爲宰百事難尤難
在胥吏以彼閭閻深况加嗜欲蔽奸猾本性成乘閒工
窺伺翻案或緣情見利豈思義譬猶虎而冠出柙人爭
避去詐復去貪要在能駕馭苟能燭其奸盡法無輕恕
安得清風來好驅大暑去言之可謂深切又有揚州雜
詩云一椽遺宅沒寒蕪瀾息波平井已枯三月煙花春
似海更無人問董江都香漂粉泊悵無家啼徧垂楊剩
暮鴉一賦蕪城已淒絕不堪更訪王鈞斜緯有情味

葛壯節公駢語

葛壯節公以水師起家擒斬海盜不遺餘力嘗僞作商舟以誘賊屢獲巨寇賊懼爲之謠曰莫逢葛必不活官鎮海總兵時巡洋勞瘁感暑臥病甚劇時開閩省盜船百餘攔入浙海大府檄公率三鎮兵船總巡公力疾前往先以書馳告曰寸心自誓剿盡瘁以事君一息尚存敢偷安而負國時道光戊戌年也公官瑞安副將時會稽宗滌樓侍御稷辰贈聯云武穆兩言不愛不怕文成一訣卽知卽行公嘗手書一聯揭於治事之堂曰持躬

以正接人以誠任事惟忠決機惟勇并自作擘窠大字
顏其堂曰威惠論者謂能不負所言

上官皇后

漢書外戚傳孝昭上官皇后立十年昭帝崩昌邑王賀
卽位尊爲皇太后賀廢宣帝卽位爲太皇太后是時后
年僅十五耳而有太皇太后之稱乃史冊所未有也綱
目書后立時年五歲與漢書不符按后立於昭帝始元
四年戊戌崩於元帝建昭二年甲申年五十二以此推
之白應從漢書六歲爲是漢書又曰昭帝崩后年十四

五云此四字當是衍文

避諱

古來避諱改字至今尙有沿用不變者漢呂后名雉改爲野雞梁武帝小名練改練爲絹唐高祖之祖名虎改虎子爲馬子太宗名世民改民部爲戶部吳越文穆王名元瓘改一貫爲一千宋英宗名曙改曙讀爲山藥宋寇萊公爲相諸司公移避其名改爲准地名尤多吾浙虎林以避唐諱改稱武林嘉禾以避三國吳太子名改稱嘉興括州以避唐德宗名改稱處州其他更難悉數

劫寨

守城者必劫寨昔人之言當矣今爲廣其旨云禦敵者
必用傾誘敵者必用伏攻敵者必用閒占人制勝之術
大率如斯

明闇禍

江陰楊大令寧謂有明一代如王汪劉魏其害固不可
容言其餘諸帝自太宗仁宗而外未有不任奄人者按
明史載永樂三年命太監鄭和帥舟師下西洋八年命
內官馬靖鎮甘肅馬騏鎮交陞十八年置東廠令刺事

因謂明世宦官出使專征監軍分鎮刺臣民隱事諸大權皆自永樂開始然則明之禍莫甚於宦官而宦官之禍實基於太宗也安得謂其不任奄人哉

吳中行

吳中行劾巫主張居正得直諫名然終不可爲訓流及旣衰遂有閹黨御史智鉉受業趙南星門而疏詆南星爲元惡者

經學理學

言經學者宗宋必斥漢言理學者宗程朱必斥陸王何

見之小耶試觀

本朝孫夏峯湯文正理學皆宗陸王而未嘗悖聖道也
東吳之惠氏東浙之萬氏經學皆宗漢而未嘗悖聖教
也譬之登山者或自南或自北其路之平易遠近不能
皆同要皆望是山以行不迷於所往則因殊塗而同歸
也

柳仲塗作銘

柳仲塗爲其外祖父伊闕縣令太原王公作墓誌銘其
文首紀葬之年月與地末紀名字三代與卒年中敘事

實則全述其舅氏信詔之言蓋仿昌黎襄陽盧丞墓誌
銘述其子之語河中府法曹張君墓碣銘述其妻之語
例乃變體也銘語亦簡質云男賢若父女賢若母斯焉
爲誰柳開外祖名兮傳於世骨兮歸於土洛水邙山干
秋萬古

劉軻

唐劉軻行義最奇初爲僧繼爲道士後進士登第以能
文章名所作農夫禱有云農人不饑而天下肥蠶婦不
寒而天下安語特精妙軻爲僧時因罪遣骸感夢而精

儒學策名任史官見南部新書

斛銘

常熟蔣雨亭制軍陳錫之父侍御伊壽銘其斛曰出此
入此厥惟公平有易是者天殛其人制軍謹守家法凡
遇遷除輒蠲佃租外叔祖周葵園先生以清收租斛內
嵌木一方視他斛減二升刊字於木口少收幾粒多收
幾年至今遵用之

養一齋詩話

詩話類取近人之詩易涉標榜惟山陽潘彥輔孝廉德

與養一齋詩話尙論列代至明而止其論悉稟聖人詩教之旨以心術行誼爲本以氣骨韻味爲主近時詩話常以此爲首矣略識數則於右三百篇之體製音節不必學不能學三百篇之神理意境不可不學也神理意境者何有關係寄託一也直抒已見二也純任天機三也言有盡而意無窮四也不學三百篇則雖赫然成家要之纖瑣摹擬鉅斛淺盡而已 學詩當先求六義唐以前比興多宋以來賦多故韻味迥殊 詩積故實固是一病矯之者則又曰詩本性情余究其所謂性情者

最高不過嘲風雪弄花草耳其下則歎老嗟窮志向離
離其尤悖理則荒淫狎嫖之語皆以入詩非獨不引爲
耻且曰此吾言情之什古之所不禁也於序此豈性情
也哉吾所謂性情者於三百篇取一言曰柔惠且直而
已此不畏彊禦不侮鰥寡之本原也老杜云公若登台
輔臨危莫愛身直也窮年憂黎元歎息腸內熱柔惠也
樂天云况多剛狷性難與世同塵直也不辭爲俗吏且
欲活疲民柔惠也兩公此類詩句開卷卽是得古詩人
之性情矣舍此而言性情詩之螟螣也性情二字頗不

易言更勿誤認 吾學詩數十年近始悟詩境全貴質
實二字蓋詩本是文采上事若不以質實爲貴則文濟
以文文勝則靡矣吾取虞道園之詩者以其質也取顧
亭林之詩者以其實也亭林作詩不如道園之富然字
字皆實此修辭立誠之旨也竹垞歸愚選明詩皆及亭
林皆未嘗尊爲詩家高境蓋二公學詩見地猶爲文采
所囿耳

龍井寺

西湖龍井寺重修於乾隆二十六年明年仲春

高宗純皇帝敬奉

慈輿省方南服

駐蹕湖濱旬日之中

翠華四至

親洒宸章三十有一自來名勝莫之能比見於浙江巡撫莊有恭碑記余於咸豐元年重九日往游寺宇全圯殘碑斷碣偃仆荒草閒僅存秦淮海祠廡三楹壁間刊龍井題名記及無錫秦小峴侍郎瀛一跋一記謝蘊山中丞二詩因恐數年之後并此亦毀急錄之以備湖山

掌故跋云謹按始祖淮海先生以宋元豐二年至杭州
與龍井僧辨才善有龍井記龍井題名記並見集中元
豐二年己未至今乾隆六十年乙卯閱七百十有七年
而瀛以備兵浙西至龍井龍井記故宋襄陽書今壁間
碑石乃明華亭董文敏仿米書補書者龍井題名記則
尋覓不可得瀛既屬長洲周璣敬慕先生像選工上石
並補錄龍井題名記鐫像後付龍井僧嵌置寺壁無錫
裔孫瀛謹識記云龍井之名何以著以辨才僧居龍井
著也辨才居龍井何以著以余遠祖淮海先生爲辨才

作龍井記者也先生以紹聖初嘗由國史院編修出爲
杭州通判矣而其與辨才往還則在元豐二年時先生
方自淮如越省親過錢塘與參寥訪辨才於壽聖院之
潮音堂憩龍井亭據石酌泉爲之題名又爲之記乾隆
乙卯春瀛監司浙右過龍井既嘗摹先生像竝補書龍
井題名錢諸石嵌龍井壁閒旣而思曰吾祖文章氣節
與蘇文忠略同兩公於杭皆有遺跡今文忠與李鄴侯
白刺史杯處士竝祀孤山稱四賢而先生則無有祠而
祀之者龍井故先生舊游處不可以無祀爰於隙地拜

屋三楹中奉先生栗主而左則以辨才補焉瀛嘗按先生游龍井與辨才善旋別去其後先生倅杭在紹聖初辨才示寂於元祐八年是先生再至杭州辨才已歿而龍井之名猶特以先生與辨才而著

聖天子時巡蒞止

親洒翰墨

天文炳煜照耀山谷蓋賢喆之流風遠矣龍井故在風篁嶺上俗稱老龍井今龍井距風篁嶺半里許所謂壽聖院潮音堂都不可考方先生倅杭卽道貶處州是以

無政蹟可見今栗主稱杭州通判者以先生嘗奉有倅
杭之命則從先生官宜也祠之落成以嘉慶元年十二
月朔日董其役者前浙江臨海縣知縣無錫華瑞潢龍
井僧廣浩浙江杭嘉湖兵備道無錫裔孫秦瀛撰翰林
侍講錢塘後學梁同書書詩云杖策呼龍半夜吟揮毫
對客聽潮音封侯那敵識蘇面說傷同來印佛心淮海
無雙推國士衣冠中歲宴瓊林倚筇久作歸歎想簞食
風泉托意深被謫杭州又處州觚稜十載夢仙游熙豐
紹復憐諸老黨籍遷移到遠阪烏鵲欄杆人去後古藤

花影月明秋雨深溪路黃鸝語彷彿先生在上頭丁巳
夏日謁少游先生祠二首南康謝啟昆

薌昀公輓聯

先君子薌昀公諱元錚生於先大父秋畦公臨海縣學
官廨時乾隆辛丑年也道光己亥

以滌

司鐸合郡迎養

署中先君子精八分書法求者衆集應之不倦性嗜花
栽植盈庭四時燦爛不絕興至則縱遊巖壑或與二三
朋好瀟茗倚杯優游永日與人仁恕誠恪周急惟恐不
及甲辰九月以中風疾棄養台人上弔者皆哭失聲投

贈輓聯錄其尤者於左山陽郭太守恆辰云鱣舍怡怡
看三徑香多省識人如菊淡鯉庭侍養懷六年吏隱遽
聞詩詠義哀長白雙協鎮德云七十載德望常尊子舍
銜鯉濟美克成名進士萬人峯吟踪重到仙區化鶴歸
真定列上清班武進馮明府翊云鶴伴恩桑榆台嶽重
遊六十年前來處去鯉庭茂桃李檉書可讀五十言在
歿猶存蕭山張學博錫戊云名成鯉對諸錫鸞封最愜
心鏡水辭官先君子於戊戌歲攝會稽縣學事霞城就養閒卽栽花病
還作草忍撒手金英正放墨潘猶濃臨海傅學博兆蘭

云閱歷徧名區玩水登山七秩精神欣矍鑠笑談貽構
幄栽花賭酒五年杖履憶追陪臨海洪明府瞻陞云隨
宦海爲汗漫之游樽酒常攜中聖中賢無非樂趣就祿
養於降生之地名山久住是仙是佛合有前因

同里孔憲
采填諱

竹杖浸厠

刑傷飲小便止痛解毒獲效最神秀水諸襄七宮詹錦
之先人有爲縣吏者憫刑人之痛苦每竹杖必浸厠中
久而後用之如是者數十年迨宮詹顯達人咸謂因是
得報

九言聯

九言輓聯難得佳者嘗於仁和陳子誠茂才世敬家見其尊人座聯云蒙二爻以子克家爲吉箕五福得考終命而全用經語妙造自然

妝域

杭堇浦太史道古堂集有妝域聯句詩并序云妝域者彤圖圍如璧徑四寸以象牙爲之面平縷以樹石人物丹碧粲然背微隆起作坐龍蟠屈狀旁刻妝域二小字楷法精謹當背中央凸處置鐵鍼僅及寸界以局手旋

之使鍼卓立輪轉如飛復以袖拂則久久不能停踰局

者有罰相傳爲前代宮人角勝之戲如武林舊事所載

千千日下舊聞之放空鐘之類蓋藉以銷吹花永晝題

葉閒思所謂妝域者也詩長不備錄摘其中閒十韻云

烏三匝未棲蕉百回仍剝

趙信意林

蓬卷無根株渴洄亂清

濁

沈嘉轍

徐時影續翻急處勢騰踔

吳焯尺鳧

氣渴猶蟻旋

局殘屢鶴啄

趙信功下

文窗紛合圍紅袖競關撲

嘉快

奪金

百鏃偏輸玉雙珎

信

迴腸託防閑匪石謾謠詠

鳳鸞

擁

髻婢爭看扶腰女初學

嘉

眉翠側輕鈿臂瘦動寬鐲

世駿

人語喧行廊花光颺繡桁焯摹寫情狀絕佳

觀龍舟詩

嘉慶閒

御製觀龍舟詩命諸詞臣賡和皆爲水嬉嬉字韻所窘
鮮有合作錢塘陳荔宰師嵩慶和云四海魚龍呈曼
衍九重珠玉散荒嬉蓋是日方以崇儉黜奢詔宣示中
外故詩意及之

睿皇帝大稱賞諭爲諸詩之冠由是寵眷有加遂躋卿
貳

歸去來辭序

陶靖節歸去來兮辭序一百九十八言敘次詳盡語樸
旨深有此辭必有此序而其美始全近世坊本往往芟
去不刻謬矣

顧橫波小像

程春廬京丞博雅嗜古所蓄書畫甚多余曾於其姪銀
灣參軍世樾處見顧橫波小像一幅丰姿嫣然呼之欲
出上幅右方款二行云崇禎己卯七夕後二日寫於眉
樓玉樵生王樸左方詩二首云腰妬楊枝髮妬雲斷魂

鶯語夜深聞秦樓應被東風誤未遣羅敷嫁使君淮南
龔鼎孳題識盡飄零苦而今始得家燈煤知妾喜特著
兩頭花庚辰正月廿三日燈下眉生顧媚書

一字師

李紳吏正叔孫媾之媾讀爲救咎反之誤楊廷秀吏正
干寶爲于寶之誤齊己早梅詩前村深雪裏昨夜數枝
開鄭谷改數爲一張詠獨恨太平無一事江南閒殺老
尙書蕭楚才改恨爲幸程風衣嗣立滿頭白髮來偏早
到手黃金去已多周白民振采改到作信告所謂一字

師也他若范文正公嚴先生祠堂記云先生之德山高
水長李泰伯改德爲風蘇東坡富韓公神道碑云公之
勲在史官德在生民天子虛已聽公西戎北狄視公進
退以爲輕重然一趙濟能搖之張文潛亦能爲敢宋省
試賦題天子聽朔於南門之外滿易皆曰詣南門而聽
焉惟魁多士者改詣爲出王貞石御溝詩此波涵帝澤
無處濯塵纓黃休改波爲中任翻題台州寺壁詩前峯
月照一江水僧在翠微開竹房有觀者改一爲半陸舉
之巖邊桂樹團丹霽石上苔花閣綠雲王蔭伯改園爲

生改閣爲動張虞山養重南樓楚雨三更遠春水吳江
一夜增王漁洋改增爲生陳香泉奕禧斜日一川沂水
北秋峯萬點益門西王漁洋改峯爲山是亦於一字分
工拙也此類尙多未遑悉載

千字文

周興嗣千字文今之科場號舍文卷及民間質庫計簿
皆以其字編次爲識取其字無重複且衆人習熟易於
檢覓也雍正元年禮部議准鄉會試硃卷字號將千字
文內不佳字樣揀去荒弔伐罪毀傷悲虛禍惡竭盡終

賤離顛虧疲逐邱第墳弱傾困滅弊刑剪耆寔黜譏極
始辱耻逼索寂寥散累遣感淵委落宰饑厭故祭祀額
悚懼恐惶愴垢駭誅斬賊盜捕叛亡魂孤陋寡愚謂其
七十五字又亞聖孟子名應避及數目四五六九等字
與號數複亦皆勿用余按鮑氏知不足齋叢書以千字
文編頁改禍因惡積句爲祿因功積蓋亦以字之當諱
而易之也

劉太史詩

陽湖劉芙初太史剛縉天才藻發早歲入成均與莫寶

齋侍郎齊名年過四十始以第一人掾南宮朝野皆以
大魁期之而劉則以閤作未佳慙憾成疾 殿試時書
卷潦草遂不得鼎甲所著尚絅堂詩集佳句如江遠全
浮樹山低半入城霽雪他鄉樹春燈獨夜船野水自成
渡亂峯爭入樓江上春陰孤店外客中寒食百花前好
春似水難消劫名士如花易散場夢來好夜連天遠情
到中年比海深棋局在心還斂手酒杯如影不離身吐
屬雋妙不愧名士風流劉久困名場羈旅漂泊感慨無
聊之意悉寓諸詩如身世漫將書慰藉姓名都與刺消

磨全家別後貧兼病獨客歸來哭當歌琴餘焦尾聲都
死燭燼傷心淚亦乾生原有恨偏同世歸已無聊況異
鄉萬念總由蠶自縛一生祇有蠹相憐情辭悱惻讀之
尤令人輒喚奈何

姚明府

道光庚子嘆夷陷定海邑合姚履堂懷祥赴水殉難越
九年其友謝厚菴參軍蘭生以明府分校時藍筆所作
詩刊石吳山祠中杭州太守徐信軒先生敬爲作啟徵
詩詞氣雄壯結段尤佳云當夫神祠月黑山阿雨來遠

聞鶴笙自天而下明府披上清之法服駕逍遙之雲車
陟降在庭摩挲片石靈旗東指茫茫怒濤成鼓無聲妖
烽絕燄歎葬身之得所吾從焉夷聽招魂於異鄉誰非
宋玉邈彼英爽庶幾樂胥嗚呼顏魯公捭拳透爪之氣
早知在爭坐位閒岳鄂王怒髮衝冠之詞宜對峙樓霞
嶺上

思忠錄景忠錄

參軍又纂思忠錄景忠錄表揚死難諸人錢警石學博
爲題長歌敘述甚詳其辭曰謝君昔日曾從戎軍門論

事驚凡聾有手恨不能殺賊濡染大筆思勸忠凡死夷

難盡箸錄託始吾浙之甬東姚知縣

懷祥福建侯官人

全典史

福甘肅人

李縣丞

向陽雲南昆明人

先後死

朝廷重寄果何人漫

言死職無文臣不見乍浦同知韋逢甲

山東人

上海典史

楊慶恩

山陰人

與夫運餉知縣顏履敬

甘肅人

皆不避賊圖

生存事間荷褒卹乃其武臣死雖同蔭其子孫武臣

首數陳提督

化成同安人

吳淞作鎮若山岳壯哉至死猶橫

稍從之死者有六忠

韋印福錢金玉龔齡垣許林許攀桂徐大華皆領官兵亦與其難婁

縣廩生楊秉把撰六忠傳厚菴云尚有外委姚雁字

不愧將軍之部曲厦門與虎

門大角連沙角閩粵諸將多死綏

提督關天培總兵江
繼芸詳福三江副將

陳連升及後來甬上四鎮亦卓犖

壽春總兵王錫明處
州總兵鄭國鴻定海

其子鵬舉總兵葛雲飛狼更有朱家父子兵

金華副將朱貴
及其子昭南大寶

山頭在慈溪縣死尤酷死雖酷功實多從死之士卒其名亦

不磨所惜張總戎朝發功罪猶殊科同時有直筆若文

若詩歌謝君一一勤搜羅天知謝君劇好事先遣收藏

棘閣字乙未鄉試厚巷從事外簾姚公異時攝職之永

嘉突兀堂前見題識葛公雲飛楹聯在瑞安副戎署厚
巷手拓與姚公遺墨同徵題詠

完人遺墨得合并力透紙背想忠義更教華蓋謁雙忠

陳忠毅公丹赤馬忠勤公璘同死耿精忠之難馬公弔
之姪穎姿家人張亦寶亦死焉有祠在溫州華蓋山
占傷今同一致同官率錢新崇祠碑傳遺文急編次先
人紀錄有思賢

厚菴之先橫山先生應芳有思賢錄記宋道鄉鄒公事

續以景忠

思忠可連類開緘字字光芒寒讀之使我慘不歡粵西
方探赤白丸願以此激壯士肝嗚呼小醜勿蔓衍卽日
蕩平罷征戰安良除暴賴郡縣豈無治行稱最善請君
更補循吏傳

徐阮鄰師詩

徐阮鄰師以名孝廉出宰秦中大吏皆刮目相待擢階

州牧解組歸林下優游娛情詩酒著有抱碧堂集行世
詩尤長於七言律句如秋感云百蟲愁語古今感一笛
涼生天地秋山汜水抵鞏縣云陰谷雙輪雷入地頽崖
一線井窺天山行云樹顛野戍雲攔路山鱗人家石築
門初冬石觜山旅夜云十月苦寒邊地早一樽清話故
人同游拙政園云四圍花淑鷗眠艇一徑松陰鶴候門
寄懷吟谷叔豫章云九派江流歸棹遠一春柳色小樓
多清華流逸不愧作者又江船雜詠絕句云江迴灘繞
百千灣幾日離腸九曲環一櫂書眉聲裏過客愁多似

富春山情味絕似漁洋

李芝齡師

李芝齡師於嘉慶丙子年繼汪文端公來浙視學秉文
端公之訓以衡文一時名士皆荷裁成無滄海遺珠之
憾公蒞浙時賦詩云 詔持使節莅南邦紫塞迎 鑾

荷 澤 龐 天語寵褒文第一

九日喀喇河屯 行宮
召見奉有考試差第

一往視浙師恩泣感士無雙 辛酉選拔師為嘉善錢輔
堂先生曾以國士無雙命

題茲行過師故里 搜才期副 丹宸望 文淵藪當取有
不勝知己之感

用之才 繼響難賡白雪腔 時接汪瑟 五夜霜鐘催早發
之 諭 卷師之作

扁舟寒雨下吳江 秦黔萬里將吟鬚況此名山似畫
圖得友更欣逢白傅時同年吳棟無詩或恐負西湖淡
粧濃抹皆奇格秋實春華總奧區多少榭楠期入貢肯
遺大澤夜光珠情文斐妮迄今士林猶能誦之

元駢體文

元駢體文不及宋人之精警而鍊詞工雅亦有足采者
茲就文類中摘錄以識其概閭復丞相阿朮贈諡制起
云邊外開邊四達弗庭之域將門出將三持分閭之權
姚燧左丞許衡贈官制起云天非繼聖學之墜緒則不

生命世之大才國欲與王道以比隆肆用爲承氏之先
覺姚燧耶律鈞賄官制起云臣克厥艱而始民以其德
子焉能仕皆由父教之忠王構丞相蒼刺罕贈諡制起
云予故宣力於四方所賴人才之協助天不憖遺於一
老其何治化之成能程鉅夫丞相卜憐吉卦河南王制
起云撫帝業之艱難爰思將帥啟功臣之盟誓宜及子
孫謝端御史大夫相嘉頂利封諡制起云列爵之等以
馭貴孰加於諸侯王元勲之冒而象賢宜膺於三錫命
吳澄謝賜禮物表起云接地風雲際會親逢於明主麗

天日月照臨遠及於老臣盧互賀親祀太廟表起云九重御極太平端拱於中天萬舞奏庭順禮告成於清廟虞集賀正旦表起云陽春發育明新若日之方中正朔會同溥博如天之爲大謝端賀親祀南郊表起云四方於理事天致恭已之誠三年而郊卜日叶用辛之吉楊文郁賀千秋戕起云陽常居於大夏方收養毓之功震一索爲長男載啟亨嘉之會姚燧丞相塔剌哈追封洪陽王制末云嗚呼何但上下床盡餘子可東之高閣如失左右手慨正人不作於下泉王構翰林承旨姚燧父

楨贈官制末云於戲貞風千古歸然不廢魯靈光太史
一家嗣者無慙漢司馬鄧文原許衡妻敬氏封魏國夫
人制末云於戲夫婦相敬如賓亦旣追榮於偕老公侯
必復其始尙其啟迪於後人王士熙太史令王恂贈諡
制末云於戲元氣所憑不存亡於生死九原可作尙哀
榮於始終徐世隆賀東昌路平宋表末云駿奔效命正
海內一家之時虎拜揚休上天子萬年之壽鄧文原賀
聖節表末云廣文王有聲之詩載歌律呂衍殷宗無逸
之壽虔祝華嵩

梁楚生詩

杭州梁楚生女史德繩爲冲泉少司空教書之女歸德
清許周生駕部宗彥平生惟耽吟詠著有古春軒詩鈔
卽景星夫子云薄雲漏日明孤塔新水涵秋淡遠天送
接山四兄之粵西任云江山勝處詩尤健兒女多時宜
亦愁皆集中佳句也

學醫宜慎

程杏軒醫案歷敘生平治驗頗有心得惟治張汝功之
女暑風用葛根防風等藥遂致邪陷心包神昏肢厥旋

用清絡熱開裏竅之劑而勢益劇變成瘧證而歿因謂暑入心包至危至急不可救藥而不知暑風大忌辛溫升散其初方用葛根防風切耗陰津遂致熱邪入裏觀此可見醫學之難憶道光癸巳仲秋三弟以瀨年十五患伏暑症初見發熱惡寒頭痛延同里某醫治之某醫道負盛名診視匆遽誤謂感寒用桂枝葛根防風等藥二劑而神昏肢冷余時方自郡城歸更延茅平齋治之以爲熱邪入裏用生地元參銀花連翹竹葉等味竟不能痊人皆歸咎於茅而不知實悞於某也并記於此以

明學醫之宜慎焉

岳王祠聯

岳王祠聯云百戰妙一心運用兩言決千古太平又云
子孝臣忠決戰早成三字獄君猜相忌偏安還賴十年
功又錢伯瑜中丞聯云萬里壞長城歎息北征將士中
原指半壁傷心南渡君臣又王之裔孫鎮南爲浙江運
使時修葺祠宇題聯云天章褒臣節想當年竭力致身
忠孝兼全萬古精誠光日月祖訓衍家傳願奕葉承先
啟後蒸嘗勿替千秋俎豆炳湖山皆警策

惲南田詩

武進惲南田格畫花卉爲

本朝第一而詩字亦佳時稱三絕所著甌香館集佳作如送江西羅飯牛云長天孤鶴又西飛八月新涼到客衣歌吹竹西留不住滿江秋月一帆歸湖上張李二子在閩南不至云十年吳客不聞簫珠樹三山人夢遙秋到閩南人未返愁心多作海門潮格韻俱勝

評蘇詩

蘇長公詩才雄氣豪獨有千古然不善學之每流於粗

紀文達公評公詩鍼砭處切中要害有裨學者錄數條
於此南康望湖亭詩八月渡長湖蕭條萬象疏秋風片
帆急暮靄一山孤評國心猶在康時術已虛岷峨家萬
里投老得歸無評云但存唐人聲貌而無味可咀此種
最害事而轉相神聖自命曰高相或嘗警輒嗤曰俗蓋
盛唐之說愈多而盛唐之真愈失送范德孺詩漸覺東
風料峭寒青蒿黃韭試春盤遙想慶州千嶂裏暮雲衰
草雪漫漫評云太落送行詩窠自此真可贈徧天下人
者讀孟郊詩詩二首夜讀孟郊詩細字如牛毛寒燈照

昏花佳處時一遭孤芳擢荒穢苦語餘詩騷水清石鑿
鑿湍激不受篙初如食小魚所得不償勞又似煮彭蠡
竟日嚼空螯要當關僧清未足當韓豪人生如朝露日
夜火消膏何苦將兩耳聽此寒蟲號不如且置之飲我
玉色醪我憎孟郊詩復作孟郊語饑腸自鳴喚空壁轉
饑鼠詩從肺腑出出輒愁肺腑有如黃河魚出膏以自
煮尙愛銅斗歌鄙俚頗近古桃弓射鴨罷獨速短蓑舞
不憂踏船翻踏浪不蹈土吳姬霜雪白赤腳浣白紵嫁
與踏浪兄不識離別苦歌君江湖曲感我長羈旅評云

卽作東野體如昌黎樊宗師諸例意謂東野體我固能之但不爲耳然東坡以雄視百代之才而往往傷率傷漫傷放傷露者正坐不肯爲郊島少一番苦吟工夫耳讀者亦不可不知

鐵畫

蕪湖鄧工湯鵬能揉鐵作畫花竹蟲鳥曲盡生致又能作山水屏障好事者以木範之懸於壁或合四面成一燈鍾鑄之巧前此未有湯歿後其法不傳或有仿爲之者工拙懸殊矣仁和朱茂才文藻賦此有句云乍看似

墨潑絹素山水人物皆空嵌風飄秀色動蘭竹雪摧老
橡撐松杉華軒逼人有寒氣盛暑亦欲添衣衫最宜擁
爐曉春夜干枝萬蕊發翠巖元明舊蹟共諦視轉覺暗
淡精神槭摹寫絕妙

沈觀察

吾邑沈青齋觀察啟震幼時父介亭封公廕光館於外
母孔太恭人親教之讀太恭人有寄外詩云窗下看兒
溫魯論燈前教婢揀吳棉及夜枕先愁明日米朝寒又
典過冬衣等句皆紀實也觀察官運河太恭人板輿就

養戒之曰毋慮不足而多取一錢毋恃有餘而多用一錢
稽文恭公題其言爲題慎一齋額觀察卽以名其詩
集集中佳句如日影半窺樹山光高入城夕陽孤鳥沒
春雨一篙深僮沽酒去白磨墨僧叩門來惟借書疎雨
斷橋驢背酒淺灘孤艇驚傍燈皆有詩致觀察博學多
聞兼工尺牘其幼子秀生乃暮年所得馮星實鴻臚應
相以書賀之觀察荅柬有云挿成陰之楊柳我本無心
畫依樣之葫蘆君其努力吾里北棚外分水書院爲觀
察所創地有三元閣觀察手題聯云天錫名山儲二酉

人登傑閣兆三元

湯將軍殉節詩

咸豐癸丑年二月十一日金陵被陷將軍祥厚力戰殉
難總督陸建瀛乘輿遁爲亂兵殺時武進湯雨生將
軍貽汾寓居金陵於城陷之次日賦絕命詩投城北李
氏園池死年七十有六遺命薦席捲埋竹園內以手卷
百餘殉後拋棄殆盡詩文稿亦散失惟絕命詩爲僕攜
出得傳先是將軍之祖大奎官福建鳳山知縣父荀業
隨任乾隆時林爽文之亂父子同殉邑人呈請

救建父忠平孝祠將軍以難蔭世襲雲騎尉官至樂清
協副將工詩愛士有古名將風服官三十年以病告歸
居金陵二十年將軍嘗題聯於金陵所居之堂爲藝林
傳述醉翁之醉狂天之狂四十年舊雨
無多屈指誰爲三從客南嶺以南北海以至是殉節洵
北千萬里閒雲自在到頭還愛六朝山克繩先烈而不負

國恩矣其絕命詩云死生輕一瞬名義重千秋骨肉非
甘棄兒孫好自謀故鄉魂可到絕筆淚難收藁葬毋子
慟平生積罪尤將軍之姪成烈刊以徵詩并次韻作哀
輓詞云授命臨危日成仁蹈義秋全歸能繼志絕筆見

詒謀翼鏢心仍壯沈埋骨未收

遺命以蘆席捲埋竹園內雙思堂下

水清冷更何尤陳書談要略

公曾刻金湯十二等諸書去歲嘗以戰守滅賊諸略

上書江督陸建瀛恐賊有卒

肇畫已經秋保衛乘城績

至江甯之勢陸笑而不用

道光壬寅噴夷犯順公與在籍紳士周開麒

蔡世松設保衛局同心防堵奉

旨褒獎艱危在野

謀燎原詎易撲覆局竟難收赫赫誰當路能無眾口尤

陸帥自九江一晝夜遁歸江甯安慶因之而金陵龍虎

潰復嶽采石扼險之師入城金陵因之而陷

地一夕黯然秋祇有聞風遁

蘇撫楊文定先駐江甯聞陸帥遁於九江即日遁還

京口復遁江甯無未雨謀黃巾猶未合赤幟已全收白

髮丹心炯身殲亂可尤家國無窮恨當茲多難秋枕戈

期遂志投筆未成謀莫洩心胸憤何能涕淚收從戎吾
計決報復庶無尤一時和者甚多錢塘張亦篋茂才炳
詩最佳附錄於後碧血四十字寒潭萬古秋林泉能赴
義忠孝故詒謀盡室艱誰託孤城黯未收鬼雄知不瞑
迅望掃嶺尤江南誰覆餗口自陽秋尸有王彭祖才
無孫仲謀鄰防軍太玩逸老策空收退舍帆何遽翻難
阻石尤陸帥自九江駛風遂使窺三郡徂春又及秋金
錢縻內帑玉帳待成謀孤憤敷天積瘡痍遍地收卻
思籌十二空憶策嚴尤將軍曾刻金湯十二風雅思公

籌諸書及防事宜

昔篋簞萬个秋王辰之夏曾乞公墨竹宦從鷗比澹田與鶴分謀
名有湖山識忠皆翰墨收男兒森大節隻字亦殊尤

金總憲論詩

仁和金檜門總憲德瑛詩骨堅意警不主故常其評昌
黎桃花源圖詩云凡古人與後人其賦一題者最可觀
其用意關鍵如桃源陶公五言爾雅從容草檠木蕤四
句略加形容便足摩詰不得不變七言然猶皆用本色
語不露斧鑿痕也昌黎則加以雄健壯麗猶一一依故
事鋪陳也至後來王荊公則單刀直入不復層次敘述

此承前人之後故以變化爭勝使拘拘陳迹則古有名
篇後可擱筆何庸多贅詩格固爾用意亦然前人皆於
實境點染昌黎云當時萬事皆眼見不知幾許猶流傳
則從情景虛中摹擬矣荆公云雖有父子無君臣天下
紛紛經幾秦皆前所未道大抵後人須精刻過前人然
後可以爭勝試取古人同題者參觀無不皆然苟無新
意不必重作世有議後人之透露不如前人之含蓄者
此執一而不知變也觀公此論可知其詩得力之所在
矣

吳雪坡詩

同里吳雪坡上舍鉉堂少嗜爲詩出語清俊以不善謀
生家計日窘有友媚事顯者招之往謂從我游則饒裕
可立致吳力拒之託詠燕以見志云社日重來覓舊巢
一雙飛處傍花梢莫誇王謝門庭好恐被尋常百姓嘲
晚年益肆力於詩斗室酣吟蕭然自得無脩石儲不顧
也著有棄餘偶存草錄其最佳者於左詠史云小勇憑
血氣大勇尙智謀荆卿狗屠耳翻與虎狼讐覆燕不足
惜終負於期頭至今易水上悲風常颭颭咄哉張子房

乃欲效其尤游硤石東西兩山云紫藤花外啼暮禽碧
雲寺前數峯陰雪根倒挿下無際絕壑奔流泉瀑深夕
陽欲落猶未落何處炊煙出茅屋槎枒怪石立如人
一路寒聲響叢竹送兒云我已無家別兒今別更難一身
何處去雙淚幾時乾世路風波險年華草木看此生須
努力菽水望承歡秋海棠云誰彈粉淚染猩紅蟋蟀欄
邊見幾叢絕色從來多晚嫁休將遲暮怨西風

岳小坡詩

嘉興岳小坡上舍廷枋少有至性嘗剗左股以療母病

後父病劇又割股以進病尋瘳及父母歿哀毀骨立朝夕慟哭不已聞者感歎好讀史工韻語尤長於七言如溪上晚步云風定一蟬嘶獨樹雨餘雙鵲立枯枝舟中卽景云細草碧分游客路遠山青落酒人卮憶淩鏡蓉云廿年孤館詩人淚萬里浮雲壯士心俱堪諷誦

蔣禮山

臨海蔣禮山明府履以名孝廉官閩之德化縣有循聲調南平縣適臺匪滋事大師進討過兵絡繹供應不貲遂致賠累清查案起名列虧項三等中落職羈閩八年

始釋歸歿後其友太平戚鶴泉教授學標爲銘以哭之
云鳳凰之出爲世文章風雨冥晦墜而傷凋凋小鳥
得意方翔仰首問天其理茫茫蔣好吟詠嘗郊游得句
云疎竹曲通徑寒梅高過牆頗爲時流所稱其寓閩中
時有句云妻子田園多割捨未能拋得醉時吟可想見
風趣矣

舅氏周愚堂先生

舅氏周愚堂先生楨幼卽嗜學尤好吟詠嘗賦采桑曲
云鳩聲喔喔喚輕寒泥滑青郊行路難愁絕桑陰春欲

暮一痕濃綠上眉端人莫不賞其風韻秋試不得志授
例入成均應京兆試題詩閨中云威栗吹聲急燕樓漏
已深高堂千里夢矮屋十年心曙色明寒嶼秋香溢上
林良材焦尾識莫謂少知音放歸後益肆力於詩家居
震澤之藕湖有復古桃源洞因繪圖題詩見志云我是
漁郎慣招隱桃源久住不迷津

字宜從今

錢唐古作唐今之錢塘縣作塘蕩陰古作蕩今之蕩陰
縣作湯純留古作純今之屯留縣作屯幽古作幽今之

邠州作邠荏平古作荏又作荏今之荏平縣作荏太山
作太今之泰安州作泰非若太原太平太湖等之仍作
太吳淞江作淞今之松江府作松載在輿圖達於寰宇
皆以從今爲宜

朱梅叔

吾里朱梅叔明經湖濱烏程籍少擅才藻有聲庠序間
秋試屢見黜感憤之思皆寓之詩道光辛巳鯢溪姪鄉
試倂得復失因作闌怨詩索同人和朱有詩云傳語長
門姊妹家漫題紅葉寄天涯葦蘿村裏如花女猶向溪

頭自統紗見者皆爲開筆與張夢廬學博交好甚篤無
子其女適夢廬之子幹齋明經光錫妻卒後孑然無家
遂依幹齋以老嘗賦五十自述詩云荒村風雪數歸鴉
孤館淒涼閱歲華悵望千秋還著我側身四海已無家
酒澆竹葉都成淚笑索擔梅幸有花多謝孟公投轄意
不教萍梗向天涯其卒也幹齋爲之棺殮而無力營葬
其徒周蓮史太史士炳與同人謀醵金助之屬余作啟
曰蓋聞自古皆有死必藏幽而乃得所歸博愛之謂仁
能澤枯則其施更厚是以掩埋之典詳於禮經窀穸之

規載於左氏俾蒿里荷慈雲之覆庶楊郊免暴露之悲
況夫望重師儒生同鄉國細其品而同殷景仰述所遇
而其切悽傷生前之落魄無依銜憂已極死後之游魂
未奠歆恨尤深如已故明經朱梅叔先生幼秉異姿長
通羣籍才高命蹇行潔途窮六十年苦志懷鉛療貧乏
術五千言遺書在篋嗣業誰人晚託壻鄉遽游仙島家
無尺寸之土旌鮮期功之親未卜牛眠莫崇馬鬣荒原
蕭瑟猶淹兩世之骸淺土飄零應墮九京之淚在死者
旣難瞑目惟仁人能不傷心某等敬慕儀型謀營兆域

所捨金以布地用集腋而爲裘幽靈克安功德無量惠
及泉壤永垂梓里之芳聲載之簡編可續麥舟之故事
此舉樂助者六十餘人集資百餘金遂葬其父母妻之
柩合葬於珠村以其餘資屬幹齋存息供歲時享祭焉

題棺

德州程正夫自作一棺題曰休息菴作詩曰板屋蕭然
四壁周愚人息矣聖人休山陽阮吾山司寇蔡生自製
棺題詩其上有未死何妨暫貯書之句蕭山汪龍莊大
令治壽木題前和曰汪龍莊歸室并作詩云平生願力

志全歸六十二年幸庶幾得到藏身真蘭室居然無縫
是天衣材從楚產緣非偶制比桐棺魄可依蓋後何時
真論定硜硜素履任褒譏吾里徐瘦生茂才終身不娶
自署其棺曰獨室并題聯云埋憂待荷劉伶鍾行樂先
題表聖詩先君子薌昀公於台州購得嘉木製爲棺題
曰止止居書聯云一生倏忽少壯老萬事脫離歸去來

關侍郎

仁和關雲巖侍郎槐官中書時以善畫供奉 內廷入
詞林後直 南書房充 四庫全書提調官兼 武英

殿提調寓齋前植雙松中羅羣籍爲退息之所適

賜詩有松下敞書寮句因恭篆松下書寮四字爲齋額
儀親王贈詩云柳邊歸院金蓮燭松下仙寮玉局書梁
文定公國治贈詩云青松白鶴望蓬萊中有神仙讀書
樂皆紀實也侍郎督學廣東時遵惠研溪先生之教童子
有能成誦五經者爲青其衿士風翕然丕變奏覆試童
生加經文一篇遂定爲例

江西三魏

明江西三魏良弼良政良器以道德著新建人

本朝江西三魏伯子際瑞叔子禧季子禮以文章稱甯
都人皆同胞也

良器有弟良貴官最顯而黃氏明儒學案遺之

明狀元爭奪情

明閣臣李賢奪情羅倫爭之而見黜楊嗣昌奪情劉同
升爭之而被謫皆狀元也可爲科目增光張居正奪情
修撰沈懋學與吳中行趙用賢謀各上疏吳趙皆受杖
去國而懋學疏章爲人所持不果進乃貽居正子嗣修
書又與工部尙書李幼滋書爭之遂引疾歸是亦可謂
賢矣

沈觀察詩

沈蓮溪觀察少工四子書文登第後歷中外三十年名
益重年屆六旬遽乞歸怡情吟咏詩不摹擬前人而思
筆超雋迥軼凡近朱買臣慕云城東採土春草春巖將
軍墓近作鄰當年上書不報糧用乏邑子一薦離風塵
布衣懷綬綬少見守邸掾吏驚逡巡但誇富貴耀鄉里
無怪愚婦輕買臣侍中素貴見陵折牀上小吏彼何人
恩讐報復禍亦及悔不道中行歌長負薪決計云掉頭
決計出風塵落葉朝衫脫有因萬事不關歸里日百年

難得去官身首迴清渭思華省道遇桐廬戀舊民布襖
青衫聊自適豆羹芋飯未嫌貧南中春暮云乾坤到處
闔戈鋌風景南中尙儼然燕子梨花三月雨河豚柳絮
一溪煙暝浮士女湔褰水晴泛兒孫上冢船只有老懷
難自慰朝朝北望寸心懸無能云已廿人笑百無能風
味蕭閒亦自矜菊影半窗留客酒蟲聲四壁讀書燈少
年偶作逢場戲老去真如入定僧若論文章身後事胸
中五嶽尚崢嶸斷句如秋興云樹高留月久石瘦宿雲
多夜坐六月明蟲絮客燈暗鼠窺人懷蒼石上人云詩

格瘦於藤絡石基心尖似筍穿牆山僧云墜地虎鬚堅
似鐵窺窗鬼眼碧於燈皆清雋可諷

嚴伯牙詩

同邑門人嚴伯牙鎡比玉太守之長子也從宦滇南以
縣丞在滇試用道光丙午永昌郡回紇肆擾上官命司
軍餉兼督鄉勇助剿時賀制軍長齡巡察嚴密不攜騶
從突至營中羣僚皆以休暇他適惟伯牙在焉由是垂
青逾格以軍功薦擢縣令伯牙嫻於吟咏在軍中不廢
翰墨到處留題著有餐花室詩稿從軍云關門山色帶

斜曛羽檄交催轉餉勤馬迹千盤奔漢壘蠶叢百里關
蠻雲枕戈易醒刀環夢投筆猶爭翰墨勲早晚枚臯馳
露布饒歌歸聽瘴江濱西征曲云幾堆白骨葬茱萸是
處青山叫鷓鴣麥飯紙錢寒食雨又添新鬼哭頭顱斷
句如呈少穆宮保云年少自知更事淺官卑愈覺受恩
多由寶甯調任荔波入都引見留別滇南云一卷隨
身無長物九州行腳笑粗官語皆清俊

韜光

由靈隱至韜光路約里許石級三百餘山徑曲折沿路

皆修篁密篠濃綠杳深醉人心骨僧家以巨竹臥徑側
引泉相續不斷泉聲丁丁然靜聽移時塵慮都滌比至
山顛四望空濶近挹明湖之江遠望滄海又別有一世
界菴中題詩甚多恭讀

高宗純皇帝御製句云翠雲入叢篁赤城盤登障正如
登高而呼俯視衆山皆培塿矣

西山文集

學者編先正文集往往蒐羅散佚以多爲貴然或不知
簡擇并存其酬應世故不甚經意之作致貽後世口實

則雖意在表揚適以累之真西山先生以道統自任而
集中詩文往往推揚二氏其爲史彌遠特授正奉大夫
文稱其寬宏而縝栗剛大而粹夷有尊主庇民之誠足
以衛王室有忘身殉國之節可以通神明又金國賀正
旦使人到闕紫宸殿宴致語口號勾合曲詞有兩國交
馳通好使八荒同作太平人聖歷從茲天共遠年年玉
帛會楓宸等語皆爲後人所訾殆編集者疏於審別不
能汰其失歟

乾霍亂

乾霍亂心腹絞痛欲吐不吐欲瀉不瀉俗名絞腸沙不
急救卽死治法宜飲鹽湯探吐外治刺委中穴亦妙此
證王宇泰證治準繩謂由脾土鬱極不得發以致火熱
內擾陰陽不交而吳鞠通溫病條辨謂由伏陰與溼相
搏證有陰而無陽方用蜀椒附子乾薑等藥竊謂乾霍
亂亦如溼霍亂有寒有熱當審證施治不得專主熱劑
吳氏書開發治溫病之法辨論詳晰卓然成一家言惟
此論尙局於偏恐誤來學特正之

石灰

仁和縣志載明成化時湖墅凌知州煜家有一黃斑虎
自南河游至投凌之後巷諸門不閉虎入據廳上大吼
一聲凌衆破壁逃避虎遂登樓時凌之孫婦抱嬰兒未
起虎偶捱壁壁倒適覆婦身不遭傷害地方奔告有司
卽召獵戶二十餘人擒剿彼此相顧失色無策可施一
老者令以石灰入稀布口袋兼帶竹縛火把擇輕健七
八人升樓屋揭瓦進日光虎必仰首卽搖灰袋眯其目
繼將火把下燎虎必開口隨以堅利長鎗入口內不容
轉吮乃呼衆獵戶登樓交刺之如其策果擒獲不傷一

入罪送官司各受重賞按吾郡某典亦嘗以此法擒寇
乃道光年間事也時方歲歉劫掠時聞典主豫選衆健
兒守夜并儲石灰刀械一夜寇至壞大門將入衆健兒
出其不意以石灰噴之寇目皆瞋刀械齊發遂被擒

劉忠義

嘉慶十八年直隸教匪林清謀逆實賴陝西咸甯劉公
斌首發其事黨與擒而期會誤得以卽時戡定公爲滑
縣老岸鎮巡檢勤其職姦民畏之嘗飲聃監生所酒半
私語公曰是邑將有變亟去官可免時八月十五夜也

因時微行村落中間治兵仗聲甚厲偵鐵工具知賊李文成與林清首尾謀逆事告守令皆難其事卽訊鐵工以得李文成牛亮臣親致之縣訊文成折其脛賊始與林清謀定九月十五日期至是不及待九月七日奪城門以入公時居典史署聞變卽更短衣持械出遇賊於衢前擊殺二賊于嘉善皆死事聞

贈官知縣諡忠義子寶善蔭襲雲騎尉改文職爲貴州

某官

此事詳見上元梅伯言戶部曾亮和
規山房文集乃聖武記所未載者